

Na osnovu člana 29. stav (5) Zakona o osnovama sigurnosti saobraćaja na cestama u Bosni i Hercegovini ("Službeni glasnik BiH", br. 6/06, 75/06, 44/07, 84/09, 48/10 i 18/13), ministar komunikacija i prometa Bosne i Hercegovine donosi

**PRAVILNIK  
O OBILJEŽAVANJU VOZILA KOJIM  
UPRAVLJA LICE SA INVALIDITETOM ILI  
KOJIM SE PREVOZI LICE SA  
INVALIDITETOM 92/15**

**Član 1.**

(Predmet)

Ovim Pravilnikom uređuje se način i postupak obilježavanja vozila kojim upravlja lice sa invaliditetom ili kojim se prevozi lice sa invaliditetom, uvjeti dobijanja znaka kojim se obilježavaju ova vozila (u daljem tekstu: znak pristupačnosti), njegov izgled, način postavljanja i korišćenja, period važenja, vođenje evidencija izdatih znakova pristupačnosti, te način obilježavanja parkirališnog mjesta za ova vozila.

**Član 2.**

(Znak pristupačnosti)

(1) Znak pristupačnosti se izdaje licu sa oštećenim ekstremitetima, čiji su ekstremiteti, bitni za upravljanje vozilom, oštećeni najmanje 60% (u daljem tekstu: lice sa oštećenim ekstremitetima) i licu sa stepenom invaliditeta 100%, a koje se prevozi vozilom (u daljem tekstu: lice sa invaliditetom).

(2) Pravo na znak pristupačnosti imaju i udruženja lica sa invaliditetom.

(3) Znak pristupačnosti se postavlja na vidnom mjestu u donjem desnom uglu prednjeg vjetrobranskog stakla vozila.

(4) Znak pristupačnosti se izdaje na period od 5 godina i daje pravo parkiranja vozila na mjestu označenom za parkiranje vozila sa znakom pristupačnosti.

(5) Znak pristupačnosti važi samo kada vozilom upravlja lice sa oštećenim ekstremitetima ili se lice sa invaliditetom prevozi u vozilu.

(6) Pravo koje proizilazi iz znaka pristupačnosti ne može koristiti osoba koja nije lice iz stava (1) ovog člana.

(7) Znak pristupačnosti, izdat licu sa oštećenim ekstremitetima, važi za više vozila, uz uvjet da su podešena da njime upravlja lice sa oštećenim ekstremitetima.

**Član 3.**

(Izgled znaka pristupačnosti)

(1) Znak pristupačnosti ima oblik pravougaonika, dimenzija je 100x150 mm, ima lice i naličje, zaštitni kod i broj.

(2) Lice znaka pristupačnosti je plave boje, s ivicom bijele boje, širine 3 mm i podijeljeno je na:

a) lijevi dio, sa 3 bijela polja namijenjena za upis:

1) naziva organa koji izdaje znak pristupačnosti,

2) serijskog broja znaka i

3) roka važenja.

b) desni dio plave boje u kojem je bijelom bojom ucrtan međunarodni simbol lica sa invaliditetom.

(3) Naličje znaka pristupačnosti je bijele boje i podijeljeno je na:

a) lijevi dio, sa 3 bijela polja namijenjena za fotografiju lica s oštećenim ekstremitetima ili lica s invaliditetom i obilježen je pečatom nadležnog organa. Ispod fotografije je mjesto za upisivanje imena i prezimena, te potpisa lica sa oštećenim ekstremitetom ili lica sa invaliditetom,

b) desni dio, sa jednim poljem bijele boje, na kojem je upisan tekst "Ovaj znak pristupačnosti daje pravo na korištenje parkirališnih mjesta koja su u tu svrhu posebno obilježena", na bosanskom, srpskom, hrvatskom i engleskom jeziku.

(4) Izgled znaka pristupačnosti dat je u prilogu broj 1 i čini sastavni dio ovog Pravilnika.

(5) Izradu, štampanje i distribuciju znaka pristupačnosti osiguravaju u Federaciji Bosne i Hercegovine kantonalna ministarstva unutrašnjih poslova, u Republici Srpskoj Ministarstvo unutrašnjih poslova i u Brčko Distriktu Bosne i Hercegovine Odjel za javni registar.

**Član 4.**

(Međunarodni znak invalida)

Vozilo kojim upravlja lice sa oštećenim ekstremitetima i vozilo kojim se prevozi lice sa invaliditetom, može biti obilježeno međunarodnim znakom lica sa invaliditetom. Pravo na rezervisano parkirno mjesto se može koristiti samo uz znak pristupačnosti.

**Član 5.**

(Postupak izdavanja znaka pristupačnosti)

(1) Postupak izdavanja znaka pristupačnosti se pokreće na zahtjev lica iz člana 2. stav (1) ovog Pravilnika.

(2) Zahtjev iz stava (1) ovog člana se podnosi organu nadležnom za unutrašnje poslove, prema prebivalištu ili boravištu podnosioca zahtjeva (u daljem tekstu: nadležni organ).

(3) Za maloljetno lice sa invaliditetom, zahtjev za izdavanje znaka pristupačnosti pokreću roditelj ili staratelj lica na čije ime je vozilo registrirano.

(4) Za vozila udruženja lica s invaliditetom zahtjev za izdavanje znaka pristupačnosti pokreće ovlašteno lice.

(5) Obrazac zahtjeva dat je u prilogu broj 2 i čini sastavni dio ovog Pravilnika.

#### Član 6.

(Potrebna dokumentacija)

(1) Lice s oštećenim ekstremitetima uz zahtjev dostavlja:

a) Rješenje o stepenu oštećenja ekstremiteta, bitnim za upravljanje vozilom ili Nalaz, ocjenu i mišljenje izdato od organa entiteta Bosne i Hercegovine i Brčko Distrikta Bosne i Hercegovine, nadležnih za utvrđivanje stepena invaliditeta,

b) dvije fotografije dimenzija 30x35 mm,

c) ličnu kartu, na uvid,

d) dokaz o vlasništvu nad vozilom.

(2) Lice s invaliditetom, osim priloga iz stava (1) tač. b) i c) ovog člana uz zahtjev dostavlja Rješenje ili Nalaz, ocjenu i mišljenje izdato od organa entiteta Bosne i Hercegovine i Brčko Distrikta Bosne i Hercegovine, nadležnih za utvrđivanje stepena invaliditeta.

(3) U slučaju iz člana 5. stav (3) ovog Pravilnika, uz zahtjev, osim priloga iz stava (1) tač. b) i Rješenja ili Nalaza, ocjene i mišljenja, iz stava (2) ovog člana, se dostavlja i dokaz o srodstvu sa licem za koje se podnosi zahtjev.

(4) Udruženje iz člana 5. stav (4) ovog Pravilnika, uz zahtjev podnosi:

a) rješenje o registraciji i

b) dokaz da su njegovi članovi lica s invaliditetom.

#### Član 7.

(Rješenje)

(1) Postupajući po zahtjevu, iz člana 5. stav (1) ovog Pravilnika, nadležni organ donosi Rješenje, na način i u postupku propisanim zakonom o upravnom postupku.

(2) Dispozitiv Rješenja, iz stava (1) ovog člana sadrži i serijski broj znaka pristupačnosti.

#### Član 8.

(Zamjena znaka pristupačnosti)

Zamjena znaka pristupačnosti se vrši u sljedećim slučajevima:

a) gubitka,

a) krađe ili

b) oštećenja.

#### Član 9.

(Postupak u slučaju gubitka, krađe ili oštećenja znaka pristupačnosti)

(1) Lice kojem je izdat znak pristupačnosti dužan je odmah, a najkasnije u roku od 3 (tri) dana prijaviti nadležnoj policijskoj stanici na čijem području je saznao za gubitak ili krađu znaka pristupačnosti, gubitak ili krađu znaka pristupačnosti i podnijeti zahtjev za izdavanje novog znaka pristupačnosti na propisanom obrascu.

(2) Uz zahtjev iz stava (1) ovog člana se prilaže izvještaj nadležne policijske stanice o prijavi gubitka ili krađe znaka pristupačnosti.

(3) U slučaju oštećenja znaka pristupačnosti uz zahtjev se prilaže izjava na zapisnik o oštećenju kod nadležnog organa za registraciju vozila i u tom slučaju prilaže se i oštećeni znak pristupačnosti.

(4) U slučaju iz st. (1), (2) i (3) ovog člana znak pristupačnosti se izdaje sa rokom važenja zamijenjenog znaka pristupačnosti.

#### Član 10.

(Postupak u slučaju smrti nosioca znaka pristupačnosti)

Nadležni organ iz člana 5. stav (2) ovog Pravilnika po saznanju da je nastupila smrt nosioca znaka pristupačnosti Rješenjem poništava znak pristupačnosti.

#### Član 11.

(Evidencija izdatih znakova pristupačnosti)

Nadležni organ vodi:

a) upisnik primljenih zahtjeva i izdatih znakova pristupačnosti lica sa oštećenim ekstremitetima i karton evidencije, čiji je oblik i sadržaj dat u prilogu broj 3 i 4 i čini sastavni dio ovog Pravilnika i

b) upisnik primljenih zahtjeva i izdatih znakova pristupačnosti lica s invaliditetom i karton evidencije, čiji je oblik i sadržaj dat u prilogu br. 5 i 6 i čini sastavni dio ovog Pravilnika.

#### Član 12.

(Mjesto rezervisano za parkiranje)

(1) Mjesto rezervisano za parkiranje vozila kojim upravljaju lica sa invaliditetom mora imati na kolovozu ucrtane ivične crte i biti označeno međunarodnim znakom invalida žute boje.

(2) Parkiralište sa mjestima rezervisanim za parkiranje vozila kojim upravljaju lica sa invaliditetom, mora biti obilježeno, osim sa znakom parkirališta i dopunskom pločom koja označava parkirno mjesto rezervisano za lica sa invaliditetom.

#### (Član 13.)

(Prelazne odredbe)

(1) Znak pristupačnosti izdat prije stupanja na snagu ovog Pravilnika važi 6 mjeseci nakon donošenja ovog Pravilnika.

(2) Zahtjevima podnesenim prije stupanja na snagu ovog Pravilnika, odlučuje se u skladu sa Pravilnikom o načinu obilježavanja vozila kojim upravlja lice s oštećenim ekstremitetima ("Službeni glasnik BiH", br. 13/07 i 72/07).

(3) Danom stupanja na snagu ovog Pravilnika prestaju da važi Pravilnik o načinu obilježavanja vozila kojim upravlja lice s oštećenim ekstremitetima ("Službeni glasnik BiH", br. 13/07 i 72/07).

Član 14.

(Stupanje na snagu i objava)

Ovaj Pravilnik stupa na snagu osmog dana od dana objavljivanja u "Službenom glasniku BiH".


Broj 01-04-02-2-3537/15

18. novembra 2015. godine

Sarajevo

Ministar

**Slavko Matanović**, s. r



prostor za fotografiju  
простор за фотграфіју

ime i prezime/име и презиме

potpis/потпис

Ovaj znak pristupačnosti daje pravo na korištenje parkirališnih mjesta koja su u tu svrhu posebno obilježena

Ovaj znak pristupačnosti daje pravo na korištenje parkirališnih mjesta koja su u tu svrhu posebno obilježena.

Овај знак приступачности даје право коришћења паркинг мјеста која су у ту сврху посебно обилежена

This Symbol of Access ensures the right to use parking lots which are specifically marked for that purpose.

Prilog broj 2

Na osnovu člana 5. Pravilnika o obilježavanju vozila kojim upravlja lice sa invaliditetom ili kojim se prevozi lice sa invaliditetom („Službeni glasnik BiH“, broj \_\_\_\_/15), organu nadležnom za unutrašnje poslove podnosi se

ZAHTJEV

za izdavanje znaka pristupačnosti

\_\_\_\_\_  
(nadležni organ)

Obraćam vam se sa zahtjevom za izdavanje znaka pristupačnosti. O sebi dajem sljedeće podatke.

1.	Ime i prezime	
2.	Ime jednog roditelja	
3.	Datum i mjesto rođenja	
4.	JMB	
5.	Državljanstvo	
6.	Adresa prebivališta	
7.	Registarski broj vozila	
8.	Marka i tip vozila	

Uz zahtjev prilažem dokumentaciju propisanu pravilnikom, i to:

1. ....
2. ....
3. ....
4. ....

Izjava

Ovim izjavljujem pod punom moralnom, materijalnom i krivičnom odgovornošću da su svi podaci koje o sebi dajem, kao i ova Izjava, istiniti, potpuni i tačni, što potvrđujem svojeručnim potpisom.

U.....  
..... godine

Podnosilac zahtjeva  
\_\_\_\_\_

**Napomena:**

U slučaju kad za malodobno lice s invaliditetom zahtjev za izdavanje znaka pristupačnosti podnosi roditelj ili staratelj malodobnog lica u rubrike 1-6 zahtjeva unose se podaci malodobnog lica s invaliditetom.



Oblik i sadržaj kartona evidencije  
 „znaka pristupačnosti“

za vozilo kojim upravlja lice sa oštećenim ekstremitetima

KARTON EVIDENCije IZDATIH „ZNAKOVA PRISTUPAČNOSTI“	
Slika	Ime _____
Ser. broj znaka	Prezime _____
Datum izdavanja	JMB _____
Rok važenja	Datum i mjesto rođenja _____
Produžena do	Državljanstvo _____
Potpis osobe/lica	Broj lične karte _____
Promjene podatka upisuju se na poleđini kartona	Reg. broj vozila _____
	Marka _____
	Tip _____
	Potpis ovlaštene osobe/lica
	M.P.





Oblik i sadržaj kartona evidencije  
„znaka pristupačnosti“ lica sa invaliditetom

KARTON EVIDENCIJE IZDATIH „ZNAKOVA PRISTUPAČNOSTI“	
Slika	Ime _____  Prezime _____
Ser.broj znaka _____	JMB _____
Datum izdavanja _____	Datum i mjesto rođenja _____
Važi do _____	Državljanstvo _____
Produžena do _____	Broj lične karte _____
Potpis osobe/lica	Potpis ovlaštene osobe/lica
M.P.	
Promjene podatka upisuju se na poledini kartona	